

本朝分省人物考

分省人物考目錄卷之八十三

湖廣辰州府

劉有年

周拱元

袁伯儀

荆政芳

王信

宋以方

潘崇

蕭璆

唐愈賢

永州府

解冠

雷復

甯良

于材

程温

胡節

朱袞

周卿

楊成章

何天衢

蕭華

周璇

郴州

曹嗣宗

陳德芳

鄺子輔

李欽

鄺埜

曹璉

朱英

袁玘

何俊

鄧庠

曾轍

曾全

黃珙

崔巖

馮允中

高胤先

周叙

補遺

曹琚

陳鑛

本朝分省人物考卷之八十三

湖廣

辰州府
郴州府

永州府

劉有年

劉有年字大行沅州人元季自廬陵徙居洪武中以明經薦拜監察御史學行優卓尋以辭秩養母忤旨謫通州輸站役於州中舊家檢閱儀禮逸經十八篇上之上命付史館建文中起知太平府持正尚古抑橫軍革黠胥去淫祠釐蠹政以儒術飾吏治當塗人士多懷之靖難師至不行迎駕謫戍雲南遇王文忠公子紳自滇旋一見以道義相許黔國知其賢遣

子就學厥後交趾平起爲按察僉事卒于官

陳元

周拱元

周拱元沅州人少讀兵書出入辰沅蠻中相交易蠻人信之建文初應募入京試騎射荅策授錦衣所鎮撫軍前差遣占候輒中主將令引步兵防餉舟楫難後不屈死之

袁伯儀

袁伯儀沅陵人博學有才識永樂鄉薦以道德自重拜監察御史廉慎克振風紀時中貴人與當路有郄欲中傷之先使人謂伯儀曰若能爲我劾去此人當

有美除伯儀曰害良善以取美官君子不爲也吾爲御史可聽刑人言乎遂上疏論之後以病乞歸卒

荆政芳

荆政芳淑浦人永樂丙戌進士歷官交趾按察僉事改山東廉慎自持不苟取與致仕歸箚中惟俸金三兩家居不入城郭澹泊自如餽粥不給未聞怨悔之言

王信

王信沅陵人永樂中薦授監察御史守正不阿朝宁多憚之有囚論死暮托其鄉之顯者懷金餽之信拒

之益峻竟抵如法

宋以方

宋以方字義卿黔陽人弘治乙丑進士歷戶部郎中
出知瑞州時宸濠謀逆構亂賊潛至瑞以方設方畧
捕得之訊知反狀濠遂忿怒嗾當道劾以方有旨逮
繫獄後濠反破獄械赴彭蠡不屈憤罵至康郎山自
投于水濠鈎起縛於舟殺之棄尸水中嘉靖初江西
巡撫都御史陳洪謨巡按御史秦鉞疏陳遺忠上請
詔贈光祿寺卿錄其子祀節愍祠

潘崇

潘棠字希召辰州衛人弘治乙丑進士初授順慶府推官嘗有克敵除毒之功士民感之祀於韓文公祠擢拜南京吏科給事中每有建明時宸濠陰懷不軌請復護衛棠上疏止之中有虎而翼之語無何濠誅而棠言竟不錄論者惜之歷謫縣丞轉知縣知州陞雲南僉事致仕卒于家

蕭 瑒

蕭瑒字子鳴辰州衛人嘉靖癸未進士有才華精文翰家貧克自振勵授吏部主事擢貴州提學僉事教範嚴正後乞歸日與門人論學不倦無疾而卒

唐愈賢

唐愈賢字子克沅陵人幼穎敏比長有大志聞餘姚王守仁講學往從之游數載歸克然有得修業桃溪山中尋登嘉靖丙戌進士知浙江寧海縣政教並舉民爲建祠祀之擢拜監察御史疏劾奸黨抗言時政遂乞病歸過武穆祠云奸邪何代無秦相忠孝誰人似岳家一日與門人論學擧衣冠正寢召親友環坐對食盡歡自歌而逝

永州府

解冠

解冠字委玄道州人授戶部主事性亮直不阿監兌
浙江常例一切革之勤勞儲務邁危疾遂䟽乞歸時
巡按王璜知其清約爲置棺殮之具遣人以隨冠至
湘東始知之止受棺具及其贈金至祁陽疾革而終
柩抵家行李蕭然惟衣半篋而已

雷復

雷復字景陽寧遠人正統丙辰進士性資純穎博洽
經史任行人擢拜監察御史出補廣西按察副使轉

浙江叅政山東布政使召爲禮部侍郎改副都御史
巡撫山西歷官公正廉能臺綱振肅宦履無間言鄉
邦仰而敬之

甯良

甯良祁陽人正統乙丑進士天順間任行人上平蠻
策擢刑部員外郎轉浙江叅政處州賊平奏免運舟
價數萬緡進浙江布政使

于材

于材字國用寧遠人成化戊戌進士選翰林庶吉士
天資高邁學識優博銓授本院編修時同館自梁儲

而下數十人皆一時名士材與之頡頏其間有所修定文章煥然館中得人於斯爲盛

程溫

程溫祁陽人成化甲辰進士任南京吏部郎中公正有聲陞通政司叅議會逆瑾用事銓部議擢太僕少卿內批黜之歸家以書四百餘卷藏于學宮

胡節

胡節字國信零陵人弘治壬戌進士授行人拜監察御史巡按山東時逆瑾擅柄責賄朝士節獨無所饋瑾怒逮捕詔獄卒瑾歿贈太僕少卿

朱袞

朱袞字子文永州人弘治壬戌進士選翰林庶吉士
拜監察御史以忤逆瑾謫縣丞瑾敗起擢南吏部郎
中出補雲南叅議轉按察副使進叅政爲人朴茂善
談論爲文颺迴雲結萃律崎嶇其所蘊蓄人莫能測
其涯涘爲當時名流所推慕云

周卿

周卿字希旦江華人任兵部主事調刑部又調吏部
行誼文章爲時推重尤清苦自勵病劇僚友視之無
一言及于後事卒後無辦喪之資唯書籍數百卷而

楊成章

楊成章道州人正德時父泰任浙江巡檢以妻何氏無子娶妾丁氏生成章年四歲而孤丁敗適母何携成章扶輿歸比長爲諸生何臨歿具告之故成章痛哭曰天下豈有無母之人乎乃遠歷金衢遂鄉跡訪再往乃得之孝養終身知州葉文浩嘉之以事聞授國子學錄

何天衢

何天衢字道亨道州人以正德丁丑進士知浙江嘉

興縣多豪右天衢繩之以法恤犖獨撫逋徙墾荒積
儲政聲懋著擢拜監察御史彈劾無所避大司馬馬
端肅公昂時司宰衡稍有弗可天衢首劾之權貴歛
手逆瑾專柄遂被中傷禁錮家居瑾敗起知河南府
時鎮守王閔漁獵七郡郡多賄以重貨天衢獨抗弗
與陞陝西按察副使克謹邊防陝賴以安陞浙江按
察使轉布政使平孽族湯氏許氏之亂宸濠不執太
監畢真潛爲應援天衢設計擒之以功陞副都御史
巡撫河南鑛寇王堂倡亂督兵蕩平進工部侍郎增
祿一品留守南都災異上䟽言時政闕失 上嘉納

之卒于官

蕭華

蕭華字中美爲永州府學諸生幼孤旣長事母孝家貧苦耕所得不入私藏惟聚旨蓄以養母朝夕愉色不異嬰孺正德初母歿華年甫壯廬墓三年丙夜猶聞哭聲囑其妻不得往顧服除猶不忍歸親友強之乃歸又以父早世未伸子戢復廬其墓三年遠近莫不以孝歸之友人有欲上其事者華力阻遂寢越明年以疾卒年三十六嘉靖中巡按御史黃季瑞特表其墓

周璇

周璇字玉衡號恒齋永州衛人幼知孝友師晉齋常用主敬工夫居無惰容領鄉薦以親老就舒城學諭尋改當塗以薦轉湖州教諭陞武平令值勦賊璇單騎詣巢開諭賊党傾服當道嘉獎有以郭令公奇之者憫民饑荒專勤撫字遂以緩征坐調柳城丁內艱歸不復仕靜居一室左右圖書不履公門不談世務惟讀書講授清約表俗後進多法焉

郴州府

曹嗣宗

曹嗣宗字世傳彬州人洪武庚辰進士初授四川達縣縣丞達本宕渠故地開創官府修六相樓以祀唐李嶠劉晏元稹李適之韓滉宋張商英士民感化郡守嚴峻德薦之擢陝西僉事調江西廣東叅政所在治績懋彰民懷其惠

陳德芳

陳德芳施州人少聚徒教授洪武四年王師伐蜀德芳諷其邑令迎降乃代爲狀上前朝符印以兵助攻

瞿塘關中帥欲酬其功德芳固辭不受蜀獻王以卓
行薦使者及門芳踰垣遁去賜冠帶粟帛銓授本州
學正

鄺子輔

鄺子輔郴州人以明經任本縣訓導陞安福令不受
復改句容教諭所在咸立師範謝朓教子埜登進士
歷官陝西按察使嘗以俸錢易一絨褐歸奉子輔大
怒封還以書責之埜欲相見與僚友謀請爲鄉試考
官子輔知之復怒責之曰豈有子廉訪而父典文衡
乎其忠義之訓耿耿如是故世稱埜者以爲子輔之

賢有以督于成焉

李 欽

李欽武清衛人其先以洪武間軍功授武清衛百戶
正德辛未成進士任行人陞貴州道御史巡視居庸
武廟欲獵雲中上谷駕從居庸關出時虜闖入近陞
患且叵測欽閉關三上疏陳不可狀堅請回鑾駕果
中止于時直聲震海內中外倚重會事忤當道出知
陝西漢中府未幾總督楊一清特薦陞副使兵備延
綏歷官右副都御史巡撫四川陞工右侍郎致仕歸

鄭 棊

鄺埜字孟質，郴州宜章人。永樂辛卯進士。癸巳拜監察御史。時車駕在北京，有言南京鈔法阻滯，命往察之。衆謂將起大獄，埜往擒市豪一二以歸。奏曰：市人聞令皆震懼，今鈔法已通矣。上頷之而罷。倭寇犯遼東，命往按問戍守之失律者，凡百餘人皆應死。爲開陳其可矜狀甚明。上然而宥之。而海關吏卒邀阻行人以取財，亾迹之人則受賂縱之去。弊積滋甚。埜廉得之，歸至闕，悉擒治，抵罪弊爲之省。戍石州人有詣闕告變者，州與陝人羣聚千餘謀不軌。上擢爲陝西按察司副使，往理其事。果實卽以

官軍勦戮母貽民患賜之楮幣給驛而行比至察其
誣乃反獄亾命妄言與脫死卽具以聞 上命止弗
問而誅其造誣者宣德己酉陝右饑華陰宜川尤甚
公私廩皆竭堃巡歷其地乃移旁縣粟以賑貸焉民
以全活任滿以憂歸除拜應天府尹輦轂之下賦惡
役繁一以養民爲務事無大小苟可興利去害罔不
用心至於督征田稅皆酌其平豪猾不得爲輕重賓
興之歲設科取士厚其禮而峻其防得人爲多歲大
熟麥有兩岐者民歸德之拒弗受正統改元進兵部
左侍郎時西鄙有警尚書王驥出征堃獨任其事

英宗加其才荆湘民多隸戎伍墊家亦與焉至是特
除其籍以示寵已未京師淫雨壞官民廬舍乞罷歸
田里 上慰免之辛酉師征麓川舉蔣貴可任卒有
功衆多其知人及徐晞以奸佞陞尚書理部事墊以
正自持不激不隨晞雖險詐亦心服之既晞卒陞尚
書盡滌宿弊振舉戎務天下軍衛總旗小旗當代者
於例必就試京師有道遠無資不能來至終身不得
代乃請於各都司試之人以爲便嘗自念曰治軍吾
職也當爲 國家惜其力養其銳氣以備不虞故凡
軍家利病有當興革者必爲上言之多見信從已已

夏也先入寇王振獨主親征詔下桀力言但當嚴飭
宣府總兵楊洪固守應禦不煩六師不聽七月六軍
啟行桀從征出關屢奏言虜犬豕不宜屈 至尊惟
指麾諸將足以成功又不聽權奸惡其數言事欲踈
之勅桀與戶部尚書王佐隨老營至懷安墜馬幾殆
從者請少畱懷安就醫藥桀曰天子在前吾爲大臣
豈可托疾求醫自便力疾而往 車駕至宣府過鷄
鳴山虜寇踵至成國公朱勇出戰敗績桀深以爲憂
再上章請疾驅入關而嚴兵爲殿皆不報最後復申
前請權奸怒曰腐儒安知兵事再妄言必死桀厲言

曰我爲社稷生靈而言何得以死懼權奸愈怒叱左右扶出坐與王佐相對泣帳中十五日土木營中無水士馬皆饑渴虜四面集矢下如雨衆奮欲戰又爲權奸所阻須臾師覆邀留上駕坐遇害明年詔贈少保官其子儀爲主事坐學博行莊仕宦四十年風裁凜然見重於士大夫威行惠施近悅遠懷服仁蹈義至老不衰生平大節亦卓乎不群矣

曹 璉

曹璉字廷器永興人宣德己酉舉人初授嘉定州學正儀矩峻雅文學縝囑正統末擢河南督學僉事以

身爲教士習丕變時于忠肅巡撫中州薦之遷陝西
按察副使都御史耿清惠公雅重其人令修通志清
戎籍錄重辟咸委任焉陟大理少卿叅贊延綏軍務
謝事歸卒所著有裕齋集

朱英

朱英字時傑桂陽人登正統乙丑進士大司馬鄺埜
深加器重曰吾鄉老成凋謝殆盡負重至遠吾於子
有望矣擢監察御史激揚有聲十四年處州賊葉宗
苗反其黨周明松等四出剽掠朝廷慮其與閩寇
合遣英與中官分守要地乃榜諭脅從示以禍福降

者甚衆又以計生致明松等數人械於慶元謀報賊首領衆三萬劫明松等卽令所司誅明松等尸於市賊聞知遂遁乃募壯勇據阨塞遠斥堠民賴以安賊平還京都督汪金以戚畹之貴縱家人奪民田英與諸御史劾之 景皇帝責金而歸其田於民中官姚廣單增怙寵恣橫又率同列劾之皆抵罪會有獻議易 皇儲有詔羣臣入議英與給事中林聰議不可繇是悟執政意俄有 詔風憲官被告訐者皆外補英上章極論其非執政益忌之尋遷廣東布政司叅議嶺南寇亂之後閭巷蕭然撫凋瘵招流亾寬徵歛

理冤滯民用蘇息奸民避役者投司府爲隸卒主者
納其賄而庇之英痛革其弊怨毀不恤也又立均徭
之法等其貲產厚薄以輕重_其役吏民稱便峒蠻爲
亂撫之不聽乃進兵勦之其黨棄賊先降者百餘人
大帥欲悉誅之英力持不可誅首惡數人而已英
宗復辟凡諍易儲者皆得優賞英嘗至京林聰已僉
都憲語英盍自陳英曰向日之言吾職耳豈覲後福
耶都憲葉盛巡撫兩廣其與革子奪之宜多諮於英
兩廣合兵勦賊葉屬英督察奸弊先是叅將范信以
兵會勦大藤峽冤誣宋泰永平等鄉居民皆賊黨屠

戮殆盡至是又欲并進城等鄉屠之以爲功英爭其
非辜且遣間使請葉丞班師民始免屠滅之慘又告
廣州半湖堡民謀亂議者欲遣兵屠之英知其冤又
力爭以免湖賊羅廟寧等寇掠郡縣奉臺檄討之官
軍執脅從者欲盡戮之英諭而遣之又別置營以處
被掠女婦兵罷訪其家歸之蓋英屢破劇盜誅止其
魁脅從賴以全活者不啻萬人巡撫上其功遷本司
右叅政 賜綵段寶鏹丁母憂解官歸服闋改陝西
叅政固原熟羌滿四反 朝命都憲項忠帥兵討之
項檄英督饋餉凡用兵方畧悉以訪之旣賊平其謀

畫居多成化五年陞福建右布政使福建八郡歲輸
大青大綠非土所產厚價買諸他省吏胥每綠以爲
奸英擇屬官廉能者總收之買以輸官民免科歛提
督市舶中官死鎮守太監分其餘貲遺藩臬力辭不
能却乃受而輸於官八年遷陝西左布政使十年陞
都察院左副都御史巡撫甘肅首陳安邊十事大槩
欲練兵積糧興屯田柔諸番皆切於時務又陳十事
如徙居戎簡貢獻謹烽燧防間諜亦常慮所不及又
遷拔褊裨授以閫職如王璽劉誠後皆爲名將 上
以兩廣久困於兵 命總督軍務兼理巡撫兩廣用

兵以來戎帥喜邊功每有小寇輒張大賊勢覲用兵
得成其私英深知其弊下令撫緝徃徃各安生業約
飭將士寇來不許輒進兵諸徃岷有倡亂者購首惡
誅之而釋其黨田州知府岑溥與其叔思平知州岑
欽煽衆以叛總帥請用兵英乃遣間使密諭欽誅明
以雪家門之耻欽感泣遂斬明父子傳首軍門十六
年平鬱林州木頭等崗蠻它如天河荔浦尋融間皆
巨盜巢穴莫不畏服乞供職貢事聞 上賜褒諭陞
右都御史交趾侵老撾地界連歲戰爭衆疑其謀入
寇勅詢處之之宜英奏曰交趾蕞爾小國不過與老

過爭地耳遣使諭之彼當悔悟不可輕用兵 上用
其言交人感愧貢方物 上表謝罪英居兩廣幾十
年 上念久勞於外乃 召入掌臺事大載考績加
太子少保會有星變詔求直言首陳八事多人所不
敢言者 上皆納用及有疾侍郎何喬新適奉 勅
賑饑晉陽聞其遣使奏事卽召使至寢室手書勉何
大略謂民饑盜起可憂賢者所當努力無一語及私
時病已亟字半不成越三日卒其忠愛之心斃而後
已云平生好學政暇手不釋卷所著有澹菴文稿誠
菴奏議認真子集凡若干卷

袁 玘

袁玘興寧人家貧力學登天順甲辰進士歷刑部郎中治獄平恕性復廉潔卒于官惟圖書敗篋而已鄉人稱其清同郡人崔岩賞與有司議給官田以贖其家

何 俊

何俊字廷彥郴州人少從父宦游北歸資業悉讓諸兄力紹家學登成化己丑進士授南京戶部主事擢雲南按察司僉事兼督雲貴學政隨俗導化濟之以嚴凡所陶鑄多中器使四年丙午乞休家無長物喜

蓄古醫方所著有訥齋稿子說字商臣成化中鄉試
第一舉進士歷刑部郎中擢河南督學僉事學政修
舉子孟春登第遂歸休

鄧庠

鄧庠字宗周宜章人成化壬辰進士初授行人拜監
察御史上疏極言時事力詆權要按陝西鎮守闈宦
誣尚書余子俊妄費糧餉庠申白甚力言觸闈宦貴
州夷弗靖撫臣請加兵命庠往勘上言宜從撫諭允
之擢河南副使會修河張秋尚書劉大夏問計于庠
請先分下流役乃濟以是河功告成轉按察使累進

副都御史督南京糧儲已而撫河南劾闕宦不法事
進戶部侍郎改副都御史撫蘇松累進戶部尚書年
踰七十手不釋卷接引後進謙和冲約不務矯飾直
見本真時稱爲長者

曾 轍

曾轍字文載永興人成化乙未進士歷刑部員外郎
值平陽有訟田久淹及蘇州衛有誣殺人罪者繫獄
十餘年轍往訊立決出補紹興知府均輸薄賦釐弊
補役亾何乞歸年七十四卒子介全念皆登進士

曾 全

曾全字復初成化丁未進士授戶部主事值星變上
疏陳四事且言都御史屠瀟不法被中以事逮繫招
獄褫秩歸號碧潭居士築室授徒以詩文自娛弟介
登進士亦豪宕不羈

黃琪

黃琪字德溫永興人成化辛丑進士知萬載縣裁決
如流庭無稽訟儲穀備荒修學宮範祭器招撫流凶
練兵弭盜用部使者薦擢刑部主事執法平允如雪
王輔之冤辯劉雲之誣衆議躓之陞江西按察僉事
以母老乞終養母卒廬墓側哭聲振林麓年七十五

終

崔巖

崔巖字民瞻郴州人成化辛丑進士歷戶部郎中陞
山東江西河南布政使轉左都御史擢南工部左侍
郎卒巖生平嚴肅不苟合居官三十餘年田園如故

馮允中

馮允中字執之成化甲辰進士初知滑縣地劇號稱
難治允中操割游刃有餘地拜監察御史擢兩淮鹽
運漕滌宿蠹巡視蘇松諸郡徃值歲饑裁減羨餘折
金備賑民甚德之逆瑾用事除名

高胤先

高胤先字世德宜章人成化丁未進士授行人弘治初奉使朝鮮與其國王辯相接禮侃侃不回還朝擢監察御史武臣怙勢觸法臺按治多畏避不決胤先按實疏正其罪奉命刷卷按浙江時故籍多掩蔽胤先照刷隱弊得所侵漏數百萬金及帛粟咸發摘之巡按大同亦多振刷在告時以事逮詔獄免官正德庚午起四川叅議不就

周叙

周叙字子厚九谿衛人生有異質猿臂善射才克濟

變不泥小節正德辛未進士授大理評事值武宗南征上疏諫阻杖之於廷謫縣丞起知韶州府轉叅政歷陞都御史總制宣大軍務進戶部侍郎提督太倉陟工部尚書督理沙河大工所至以治績見稱會災異自陳致仕歸隱九谿山中

補遺

曹琚

曹琚字仲玉郴州桂陽人弘治丙辰進士除工部主事差理濟寧諸河道兩岸隙地聽民營居懋遷月收其稅季終則會以報部用備河防而財亡浪費河道

役夫例納樁草亦歲會之報部加稽豪猾不得爲奸
利宿弊乃革政暇諸生從之講學多成名者進署虞
衡員外郎丁內外艱歸起復進郎中值除夕有旨
造烟火架費出不經草疏上之獲 俞允新寧伯奏
給京軍胖襖蓋援邊戍例也復疏其事體不同宜嚴
戒止亦獲 俞允陞廣州府知府時中官有奏 命
查盤者勢灼甚或勸折節以免禍曰拙于奉承得禍
或淺巧于奉承得禍必深吾寧拙不能巧也每裁抑
之亦終不能加害嘗行番禺道中有後山殘民訴言
被誣爲盜喙息且死乞招撫以延旦夕卽上其事于

總督招之得男婦數百人而後山盜日靖有林氏夫
遠出莫知死由繼姑訟其妻妾三人謀殺已成獄琚
知其冤指曰此一人有子豈亦同謀耶矧訟出繼姑
必皆誣也出之又有同父翁死于溺爲其生母所訟
者一鞠得其情蓋謀果出于婿也一郡皆稱神明云
調廣西梧州知府會妖賊李通寶竊發已陷北流殺
鬱林署印官擒巡捕通判以去林都憲廷選計無所
措琚請選梧兵之壯銳者征勦而留其老弱以居守
且從征江西狼兵已在河下矣出常格懸重賞以爲
梧兵助萬全之策也林遂以兵事委之進與賊戰于

新橋敗之賊走八黃山設伏以待又大敗之通寶懼而逃追斬以歸乃出令招民之脅從者給牛種使歸耕而鬱林等處公署樓堞皆燬于賊以次脩葺民不知費乃歸梧州而病亦作力跣乞歸歸一月而有鏹金文綺之賜未幾卒

陳鑛

陳鑛施州衛人父隆樂善好施卒年八十先一日取大簾焚于庭皆負券也鑛性至孝母夏遘疾慮不起乃陳刀几上旦夕拜禱刀忽躍起自剖肋左取肝方寸和粥進母以桑皮線紉其創母疾遂愈父母歿哀

毀骨立殆無人形踰年而卒

人物考卷之八十四目錄

河南開封府

安然

古朴

郭雲

王僎

楊信

任昂

王觀

程達

魏清

賀彥達

宋伯義

凌漢

滕克恭

丘鐸

張玉

趙玃

孟鏞

王彰

魏翀

傅安

顧佐

劉綱

張信

楊本

王良

許廓

郭濟

張輔

趙登

周順

郭原

高舉

韓忠

劉謙

蘇璟

王張
淪鑑

本朝京省人物考卷之八十四

南直督學御史西浙過庭訓纂集

門人蘇松備兵副使南郡熊膏叅閱

男 過銘盤

過銘孟

過銘籃

寧國府學生員嚴弘治

句容縣學生員劉孔揚全訂正

河南開封府一

安然

安然祥符人元季爲山東行省左丞守萊州大軍下
山東然率衆歸附洪武元年授起居注轉給事中尋
擢山東行省叅政立心平正撫綏勤勞祿止養身餘
以給公用二年召還爲工部尚書五年除河南叅政
九年改行省爲布政司使陞浙江布政使十二年陞
御史臺右大夫十三年改左中丞夏五月坐事免官
還鄉未幾復召爲四輔官每論事多所裨益十四年
秋以疾卒年五十八 上念其來歸之誠親制文遣
官祭之

古
朴

古朴字文質陳州人洪武初鄉貢爲太學生奉命清
理郡縣田賦圖籍丁父喪歸二十年服闋隸五軍斷
事理刑奏言家貧願仕得祿養母 太祖嘉之除工
部主事迎母就養京師二十六年母歿官給舟歸葬
二十八年服闋改兵部主事二十九年陞武選司員
外郎三十年陞郎中革除三年除兵部右侍郎壬午
年 成祖正大統改戶部右侍郎轉左侍郎賜文綺
襲衣四年因建北京命採木江西竣事特被賜賚七
年 上巡狩北京侍 仁宗監國常奉命權禮部兵
部及詹事府事十八年扈行在洪熙元年改通政使

是歲陞南京戶部尚書遂謁告歸省墓賜鈔襲衣朴
事親孝非其義一毫不苟取居官臨事蚤作夜思勤
勞弗懈一志於公無敢干以私者謹守 祖宗成憲
不敢踰越或言事久於時有過不及者亦當損益就
中志節矯矯尤惡貪墨戶部主事劉良素行不檢三
載考績居下良賄 上左右求得最考朴曰貪侈之
人終當敗露最考胡可恃也良遂誣奏他事既就逮
繫 成祖燭其誣竟釋朴他日吏部奏授良勅命封
贈其父母 仁宗曰豈弟君子福祿攸降是嘗誣奏
大臣罪者其得爲君子乎不與良卒以贓敗衆服朴

之明所治職務退未嘗語其家人冰蘖之操確乎不
移平素不事生產華靡雕琢之玩纖毫不留公退清
坐一室書冊自娛常病楊士奇往問之入其齋室几
案間獨有自警編一帙宣德三年卒於官

郭雲

郭雲南陽人身長八尺姿貌魁岸膂力絕人元季聚
鄉人爲義兵保裕州泉白寨累官至行省平章政事
及元主北奔中原悉下獨雲堅守裕州屢出戰不降
大將軍徐達遣指揮曹諒圍之雲復出戰敗被擒媢
罵求死不少屈達壯之繫送京師旣見上觀其狀

貌奇偉命釋之時方閱漢書問之曰汝識字乎曰識
遂以書使之讀雲誦其書甚習 上大喜且以其忠
義仍加賞賜授溧水知縣民咸稱之 上益以爲賢
特陞南陽衛指揮僉事俾還鄉收故部曲就戍其地
兵民樂業病卒其長子洪武十三年 上特命爲飛
熊衛指揮僉事

王 僎

王僎字幼度祥符人元末爲國子助教洪武初徵爲
修撰時開局校正音樂命僎與詹同冷謙等審定撰
成樂章上之皆稱旨四年始開科取士僎與典試又

命於大本堂授 吳王經尋遷待制同宋濂等修
洪武正韻昭鑒錄諸書既成以老致仕子弘爲龍江
通運官忤丞相胡惟庸寘之法及惟庸敗 上召僕
慰勞甚至賜以綺帛仍給舟車送還卒年七十餘

楊信

楊信世爲開封鄆陵人在元時以膽畧聞選充湖廣
砲手翼百戶戍鎮江元末四海大亂天兵定建康江
南州郡莫不震動歲丙申帥衆來歸從征常宣二州
有功授親隨帳前萬戶扈從取婺州奪城門懸橋復
隨大將取三衢繼又扈駕親征九江南康等郡下之

實授管軍千戶及陳友諒來南昌上怒下詔親征
從戰彭蠡湖及陳友諒戰沒遺孽假息武昌又從破
之既而克合肥援安豐拔永新亦與有功焉張士誠
據姑蘇常忠武王奉詔致討又從戰有功賜以文綺
三皆有副陞虎賁左衛親軍指揮使司事出戍蘄州
遂轉僉蘄州衛指揮使司事調戍武昌遷永州衛指
揮使司事俾子孫世襲其職洪武八年冬十一月詔
還京九年春二月改僉留守衛親軍指揮使司事散
官如故夏五月以疾終享年五十上聞之憫悼不
已特遣內臣祭以牲醴且勅中書大都督府御史臺

次第致真復命工部造塋聚寶山之原信幸際興王之運臨敵不懾故能立顯功受榮爵沒且不朽焉

任昂

任昂河陰縣人博覽羣書早有才譽元舉進士拜山西寧晉縣知縣不受隱居山林日以經史自娛洪武初年以儒士薦舉授襄垣學訓導雅志作人多所成就十一年擢監察御史十五年陞禮部尚書十六年正月 上命昂同太師李善長往監考教官生員高下分別班次規矩方煥然明備於是宿弊盡革增立監規八條三月廣東都指揮使狄崇王臻乞封次妻

何氏等爲淑人詔下廷臣議昂同李善長議曰禮莫大於分分莫大於名妾不可爲嫡夫人故魯莊公妾成風僖公母也稱爲夫人春秋非之哀公庶子荆之母嬖將立爲夫人使宗人躋夏獻其禮對曰無之昔周公武公娶於薛學惠娶於商自桓以下娶於齊此禮則有若以妾爲夫人則古無其禮蓋古者夫人歿貴妾攝其家事不得稱爲夫人爲庶子而貴得以推恩其母亦不得稱夫人使並嫡也今崇臻欲任私意廢大禮亂嫡妾之分不可許上從之遂命昂及翰林院儒士定嫡妾封贈例頒示中外十七年二月奉

命頒行科舉成式凡年大比子午卯酉鄉試辰戌丑未會試不拘額數三月濟南衛指揮使何誠言早失父母伯父養以爲嗣例應承重而所生父母已前受封伏乞推恩伯父以報養育之恩事下禮部議昂援宋右僕射李昉爲叔承重旣贈其叔復贈其所生爲言 上命依所請六月 上諭昂等曰近命製大成樂器將以頒天下學校俾諸生習之祀孔子朕思古人之樂所以防民欲後世之樂所以縱民欲其故何也古樂之詩章平而正後世之歌詞淫以誇古之律呂協天地自然之氣後世之律呂出人爲智巧之私

天時與地氣不審人聲與樂音不比故雖以古之詩章用古之器數亦乖戾而不合陵犯而不倫矣手擊之而不得於心口歌之而非出於志人與樂判然爲二而欲以動天地感鬼神豈不難哉然其流已久救之甚難卿等宜求諸此俾樂成而頒之諸生得以肄習庶幾可以復古人之意是年甲子初科監生首舉且中式者過半 上喜甚面諭祭酒宋訥以爲教導之功九月昂侍華蓋殿 上諭昂在京中試國子監生禮部可出榜於原籍張掛以光顯其父母自是科舉之途始重本年命署吏部事 上諭昂曰凡文官

居憂制已在職五年廉勤無贓私過犯者照品給半祿終制在職三年者給全祿未幾以年老致仕

王觀

王觀字尚賓祥符人也賦性耿介儀度英偉善譚辯長於應對國初鄉試中式入太學爲朋儕所遜服洪武十九年簡授蘇州府知府爲政嚴整多所興建發奸摘伏民憚之如神明有鵬吏錢英累構陷長吏莫敢誰何廉得之縛至庭立捶殺之由是境內奸豪屏迹人皆稱快事聞於朝 皇祖嘉歎遣行人白思忠齎勅褒之勞以羊酒歲大侵民逋無所出部使者督

之甚急乃延諸富室集郡衙飲食之使各量出貲以代貧困者之逋衆驩然如指逋乃完朝廷嘉其能榜諭天下以勵怠政者蘇郡至今猶尸祝之

程 達

程達字德孚臨潁人少負奇氣國初爲御史多所建白以言事坐削籍與一僕負擔徒步而歸居邑西郭外構茅屋二間衣食弗給達陶然自樂有劉都御史者過其里令縣官葺其室餽之粟數斛後知縣趙鍾見其寒甚將爲起屋梁棟悉具輿之門達勿受曰苟可以蔽風雨足矣鍾遂以其材爲社稷壇神庫云

魏清

魏清禹州人生有過人之識洪武中以國子生拜監察御史遇事敢言無所顧避直聲大振陞四川按察副使永樂宣德中歷轉山東山西所至皆有惠政去後民咸思之

賀彥達

賀彥達蘭陽人洪武中以人材舉授監察御史上嘗命彥達等十三人巡視天下及還有旨徧檢其裝時以賦被黜者甚多彥達篋中惟稻草數莖而已上聞之深加其忠清焉

宋伯義

宋伯義西華人剛介有守長于論說洪武中以國子
生除平涼知府有治聲陞山東右叅政轉陝西左叅
政兩任皆勤於蒞政清譽益彰

凌漢

凌漢字斗南原武人也洪武十七年以明經舉至京
師獻鳥鵲論 上善之擢司經局正字未幾出知會
稽縣以事逮繫久不決會浙江按察使陶晟入覲
上知漢無罪爲晟所淹命還釋之拜監察御史巡按
陝西疏陝西民病數事且言古人謂大夫出疆有可

以安國家利社稷者專之可也臣竊以爲在春秋戰
國則可在今大一統則不可苟許其專恐啟大臣擅
權之漸上善之召其子賜鈔二百錠衣一襲及還
京師有德漢者遇諸塗邀漢飲厚報以金漢曰子罪
當然律有定法非我私子酒可飲金不可受上聞
之嘉歎擢漢爲右都御史時詹徽爲左都御史論議
數不合每面折徽徽銜之奏遣按事蘇松因嗾御史
桂滿劾其失職左遷刑部侍郎未幾命署吏部數月
改禮部又數月上憫其衰令歸田里漢叩頭曰臣
願生居京都死葬京土上許之命居於私第歲餘

徵誅起爲左贊善又歲餘復拜右僉都御史尋令致仕漢入辭 上問先賜歸不行今歸何也對曰先詹徵在臣有後憂今徵伏誅臣無憂故敢歸爾漢有治才且剛方不屈故時人多忌之云

滕克恭

滕克恭字安卿祥符人也性明敏勤學好問博通經史尤精於詩書登至正壬午進士始仕爲江陵錄曹公廨稍東有曲江亭遶亭盡植梅江澄景霽芬郁可愛簿書之暇輒杖藜散步徘徊佇玩間發爲詩歌以寄一時之興而時人莫之知也遷翰林院經歷累官

至集賢院直學士尋致仕歸值兵亂避地錢塘與鐵
崖楊廉夫相友善詩律清婉南州人士多傳誦之時
中原未靖欲歸不可得而懷鄉之心時見諸吟咏其
寄李提舉曰錢塘經亂後應是減繁華遠信秋憑鴈
遊魂夜到家兩江罹殺掠四海廢桑麻何日重携手
春風汴水涯嘗與諸名勝讌集江閣酒酣口占小詞
一闕擊節自歌聲振金石一座盡傾咸舉觥起曰今
日滕先生高倡爲江山增槩願書之閣壁以垂永久
怡然從之 國初天兵定河南復歸故里洪武辛亥
甲子二科河南鄉試守臣重其名兩聘入貢院爲考

試官壽百餘歲終於家

丘鐸

丘鐸字文振汴之祥符人從學於故中丞劉公基通儒書兼習醫家言名動一時至正末父誠爲湖廣等處儒學提舉鐸侍母留吳越欲御車往從江右兵大起武昌陷二浙鐸騷鐸憂懼不知所爲急避地四明暨江南皆歸職方復奉母至南京每西向翹首曰武昌有來者庶幾知吾父之所在乎已而其父果至自武昌父子相見悲喜交集鐸賣藥市中以給親亾何母弟鈞擢會稽上虞巡檢鐸與父母皆同赴官母疾

鐸晝夜泣禱於神乞以身代及歿哀痛幾絕卜葬鳴鳳山之原曰鐸生也咫尺不離吾母膝下今逝矣可委體魄於無人之墟乎乃結廬墓側朝夕上食如生時當冷夜月黑悲風蕭颼鐸恐母岑寂也輒巡墓號曰鐸在斯鐸在斯其地多虎聞鐸哭聲輒避去會稽人異之稱爲真孝子云先是鐸在四明從祖父母居汴者八人貧不能自存鐸咸迎養之死皆返葬先塋人以爲難其姑適河南匡氏者年十八夫亾誓不再適鐸義之養之終身凡二十年如一日

張玉

張玉字世美祥符人仕元爲樞密知院洪武十八年
白拔來歸二十一年從征捕漁海子授濟南衛副千
戶以至都指揮同知建文卽位稍繩削親藩成祖舉
兵靖難王謀畫爲多事可否進止衆論未定者玉正
色數語立決首用玉策奪北平九門撫順鋤強三日
城內外悉定師將南出玉曰不先定薊州將爲後患
會馬宣起兵薊州迎拒玉攻之宣率衆出戰執殺宣
并執毛指揮使是夜急趨遵化戒將士止殺曰師行
以得人心爲本簡敢勇士四鼓登陴開其城門將士
入城中始覺守將率衆拒戰執殺之不傷一人分兵

承平密雲皆望風輸欵從 上至灤河玉進曰都督
潘忠楊松在漠州阨吾南路宜先擒之 上悅立發
兵曰汝爲先鋒遂攻涿州雄縣擒潘楊二都督時長
興侯耿炳文率兵二十萬屯真定玉自請往覘敵還
言軍無紀律且其上有敗氣無能爲 上至以敵衆
我寡欲試諸將勇怯召問今兵所向度可必勝否衆
未有說玉曰今當徑趨真定彼衆新集我軍乘勝一
鼓可破也 上曰善吾倚玉一人足辦吾事抵真定
接戰炳文大敗獲其左右副將李堅甯忠及都督顧
晟等斬首三萬餘級獲馬二萬復敗安陸侯吳傑軍

永平馳報江陰侯吳高等以遼東兵圍城急又謀報
曹國公李景隆引兵數十萬攻北平城 上與玉謀
東援永平既至高等棄輜重遁去玉從 上追斬甚
衆玉言大寧去此不遠請移兵襲之可免後顧 上
從之遂攻大寧殺其都指揮朱鑑北平報景隆兵圍
城急遂旋師玉請搗景隆營大戰三日城中亦鼓譟
出表裏夾攻景隆兵不支大敗遁去從攻廣昌大同
悉下謀報景隆收潰卒號百萬且復至玉言兵貴神
速先事者勝請往駐白溝河以逸待勞 上命玉率
衆馳駐河上三日景隆兵至玉以騎兵接戰景隆復

大敗收餘卒退保濟南乘勝追擊圍其城旣而解圍
還攻滄州獲其大將徐凱進攻東昌敵列陣決戰
上以數千騎繞陣後敵圍上數匝衝擊得出玉不
知上所在突入敵陣大戰連殺百十人玉竟被創
歿年五十八上慟甚旋師諸將侍語及東昌事
上曰勝負兵家常事不足計所恨艱難之際失玉令
吾寢不帖席食不下咽耳隕涕不已諸將皆泣上
卽位論功顧侍臣曰玉才備智勇論靖難功當第一
惜其蚤歿追封榮國公謚忠顯洪熙元年加封河間
王改謚忠武侑享成祖廟

趙 玚

趙玚字雲翰號雲澗祥符人也元季兵亂方在襁褓
母抱匿林莽間有虎至母懼置玚於地虎熟視而去
自幼聰敏嗜學不倦稍長游郡校嘗暑夕寢黌舍中
羣狐採麻葉作扇歡呼曰趙尚書苦熱吾輩敢憚勞
邪玚聞之益勵志讀書中洪武丁卯鄉試入太學被
命公幹山東以才勤受襲衣楮幣之賜庚午授兵部
職方司主事纂天下要害阨塞屯戍圖說以獻 高
皇帝嘉其能乙亥擢武庫員外郎慎密小心爲當路
所器重戊寅擢浙江右叅政時海寇爲患畫策捕之

地方底寧尋罹外艱還汴 文皇帝嗣位命使交趾
克宣 國威遠夷讐服歸却金寶之饋 上聞而嘉
之賜賚優渥甲申擢刑部右侍郎未幾改工部再改
禮部被命往封西寧侯宋晟歸拜禮部尚書賜宴於
華蓋殿仍徹御筵膳羞以遺其母士林榮之戊子

仁孝皇后崩 上命詣北京卜山陵告成有楮帛之
賜壬辰經略創建隆慶保安永寧諸郡撫輯調度咸
中機宜而新徙之民各安其業罔知勞役焉丁酉改
兵部尚書明年母歿守制還起復專理塞外戎政偶
疾作 上遣中官偕明醫往視少瘳入謝復令調攝

於家既愈復命詣塞北訪牧地遂具順聖川等處以
聞於是出廐馬牧之孳用蕃息壬寅 聖駕北征命
總督軍餉徂措置有方餉不告匱 仁宗嗣位改刑
部尚書在職六年虔恪如一日初徂爲郎署時一人
犯大辟死獄中出其屍實閉氣詐死也越四十年爲
司寇其人復犯法徂一見呼其姓名駭曰汝非曩死
獄中者邪訊之伏辜人以爲神宣德庚戌年六十七
累上疏乞骸骨 上憫其勞特賜致仕旣歸汴構一
室于東郭外扁曰石泉茅屋幅巾藜杖日與親友故
舊酌酒賦詩以樂太平正統丙辰卒壽七十三 上

遣官諭祭命有司營葬事徂稟賦完厚識見超卓質
直孝友博學工詩文遭際明時敷歷華要歷事五
朝才與位稱出與時合弼諧廟謨翊贊皇度晚歲
納祿里居優游林壑考終於家榮名盛福終始完備
所著有儉父集傳於世生平有異質善賞識臧否正
統中錢塘于肅愍公謙巡撫河南時謝政家居于數
造其廬以前輩禮事之甚恭一日執于手嚙之出血
于卽悟泣拜請教徂不答頃于出其孫恠問曰大人
何嚙于手憮然曰于好官惜不得令終耳然實無他
術亦惟資稟目力異也

孟鏞

孟鏞字宗器陳州人洪武庚午舉於鄉授監察御史
永樂初按雲南行部見民舍竈中白氣騰出若虺蛇
狀他日出又見之乃默告曰苟有寃當夢告其夜夢
人告曰我大理人李二也傭工于王禮家禮毆死瘞
竈下明日鏞往發之果得屍禮伏法人於是畏其神
明陞大同知府致仕

王彰

王彰字文明鄭州人幼穎悟好學稍長有司選爲州
學生益自刻苦學日進洪武丁卯領河南鄉薦明年

會試禮部弗利補大學生嘗使山東平糴以實軍儲
同列納賄縱逋負者彰毅然責之弗聽比還其人果
得罪彰遂以廉幹聞明年擢吏科給事中典封駁之
任夙夜在公出納惟允歷左右給事中益慎益虔聲
譽尤著遂進都給事中未幾改刑部員外郎時有豪
橫構訟根株連結數歲不能斷決有司率爲所誣彰
曰法貴平恕豈宜寬縱以長惡哉於是正之以法而
爲所誣者皆得釋人咸悅服旣而超拜山西布政使
司左叅政居藩七年吏弗忍欺民懷其惠永樂五年
召拜禮部右侍郎時四方萬國奉玉帛重譯以朝覲

賓貢者肩背相望於京師賞賚燕享無虛日與尚書
鄭公賜同寅協恭奉職惟謹明年以父喪去官哀毀
踰節鄉黨稱焉九年服除遷戶部侍郎嘗祀華嶽過
陝州之新安聞民鬻男女償通租既還奏之 詔悉
蠲其租且官給楮幣以贖其所鬻男女人皆德之十
年壬辰改都察院右副都御史陞右都御史

魏 翀

魏翀字子翔郟城人洪武甲戌進士授崑山知縣縣
故有催租勾庫官校久事邑中籍官屋爲牢禁里甲
輩多淹滯死翀上章論劾事下御史李嶽究治械送

京師凡二百餘人境內晏然永樂初坐事謫遵化邑
人數千伏闕懇請詔還任乃奏除包荒田租十八萬
有奇及請開蘇松淤塞二十里許皆從之民享其利
仕至監察御史

傅安

傅安字志道太康人也以縣吏起家歷四夷館通事
舍人鴻臚寺序班洪武二十七年轉兵科給事中明
年復遷禮科都給事中永樂初時西域撒馬兒罕弗
賓上遣安持節往使至其國以順逆禍福諭之撒
馬兒罕酋長負固不服且諷安使降安曰吾天朝

使臣可從汝反邪酋長怒因羈留虜庭凡十三年艱苦備嘗志節益勵酋長知終不可屈乃以禮送還國因獻名馬珠玉以謝自是王貢遂通安旣歸以老病不能任事懇乞骸骨上憫之賜一品服致仕仍令有司月給米十二石輿夫八人宣德四年卒於家上遣官諭祭仍命有司治葬事初安之使西域也方壯齡比歸鬚眉盡白同行御史姚臣太監劉惟俱物故官軍千五百人生還者十有七人而已安卒後子霖舉賢良方正任錦衣衛經歷

顧佐

顧佐字禮卿太康縣人洪武庚辰進士除莊浪知縣
在邑廉平士民頌德永樂四年以材望入爲監察御
史守正嫉邪不激不隨人稱爲真御史命招撫廣西
慶遠洞夷復隨征沙漠巡視邊關旣遷江西按察副
使蒞事勤敏威望尊號令嚴奸黠聞風遁跡聲名大
振十四年召爲應天府尹剛稜不撓吏民畏服勳豪
貴戚爲之斂手政聲赫赫議者謂類包孝肅之知開
封洪熙元年出爲貴州按察使未行改通政使宣德
初臣僚習尚宴樂以奢相競歌妓滿前紀綱爲之不
振宣德三年六月中早朝罷召大學士楊榮楊士奇

問廷臣中誰可使掌憲士奇對曰通政使顧佐廉公
有感曾任御史及按察司皆有風采榮曰佐亦嘗爲

京尹能防禁下吏政清弊革 上喜曰顧佐乃能如

此陞右都御史賜 璽書令考黜不肖洗滌積弊佐

奏黜斥貪淫御史并朝士不肖者二十餘人又禁用

歌妓糾正百僚朝綱大振天下想聞其丰采藩臬郡

邑無不興起下至吏卒相顧凜然四年吏有遭笞者

招佐之過謂受皂隸賂放歸悉具姓名以聞 上密

以示楊士奇且曰爾不舉佐廉乎對曰所訴之事誠

有非誣蓋今朝臣月俸止給米一石薪炭馬芻咸資

於皂不得不遣半歸使備所用皂亦皆樂於歸耕實
官皂兩便此京師大小臣僚皆然臣亦然自永樂以
來如此 仁宗皇帝固知之所以增朝臣之俸 上

歎曰朝臣之艱如此因怒訴者曰 朝廷用一好人

輒爲小人所排欲下法司治之士奇對曰此末事不
足上干 聖怒但付佐自治恩與法並行矣 上召

佐以吏訴狀授之佐叩首退召吏示之狀吏恐甚佐
曰 上命我治汝我姑容汝但改行爲善竟不治之

上聞之喜曰佐得大體矣數月有囚告佐枉人重罪
不聽訴理者 上大怒召楊榮士奇諭曰此有重囚

教之排佐小人陷正人不可不究治遂命三法司鞫之實千戶臧清殺一家無罪三人當死代寫狀教之誣告上曰不誅之佐何以行事立命磔清於市佐正色立朝元勛貴戚俱憚之陝西布政周景奸賊無度佐切齒欲除之屢置之法以上屢釋之不能申其激濁之意正統初以風疾乞歸優禮而去實用事者忌而陰排之後疾愈不復起居家十餘年卒後來居其位者皆莫及也議者稱爲臺臣第一云

劉綱

劉綱字文紀禹州人洪武庚辰進士除府谷知縣擢

寧州知州寧在邊鄙素稱難治綱至墾田鋤耕教以樹畜暇則聚士授經不拘拘簿書期會之間習俗丕變兩丁內外艱民詣闕乞留 詔皆許之綱在寧凡三十三年囹圄几虛常署臬司事不旬日釋寃獄者數十人 昭皇嘗賜勅獎勵 睿皇又加四品服以示寵異後以老致仕歸之日攀送者哭聲振野郡舊有祠祀良刺史狄仁傑以下六人至是增綱扁曰七君子祠云

張信

張信字彥實祥符人輔從兄也洪武己卯舉鄉試第

一永樂初拜禮科給事中轉刑科都給事中封駁糾
彈無所顧忌擢工部右侍郎會河決壞民田廬上
遣信來視信䟽河故道以殺水勢河患遂除已而浙
江守臣奏江塘湖決復命信往治數月而事襄 昭
皇卽位轉兵部左侍郎尋以輔故改錦衣衛指揮同
知累遷四川都指揮使在蜀十五年名振羗夷百姓
懷之

楊本

楊本中牟人精通法吳王撫軍本請登臺觀兵見大
水淼茫一軍無跡主駭問之本曰此水遁也及帥師

北向本嘗持三十斤鐵棒臨陣北軍披靡無敢前屢
取勝景隆忌本不上其功本約日出戰請繼兵景隆
曰種得瓜熟容別人採食耶擁兵不救本疏請治景
隆罪且曰喪師失律亦云屢矣耿炳文袁宇喪士二
十萬於燕地 皇上憐其舊臣老將不忍加刑李景
隆四月進兵喪失無數臣下若此曷望收功乎乞假
臣爲大總兵用能官一員募義勇凡先鋒叅謀等官
令臣自保舉選用特命親王監軍長驅直搗可免生
靈於塗炭議甚慷慨不能用本孤軍獨無繼被擒繫
北平獄後竟殺之

王良

王良字天性河南祥符人歷官刑部左侍郎建文中坐問燕國人罪輕左遷浙江按察使至浙謁岳鄂王墓誓曰苟媿武穆非人也壬午聞靖難師克誓以必死慟哭不已會命使召良良執使者將斬以狗爲衆劫去良乃集諸司印凡九携歸私第嗟嘆者久之妻問故良曰吾分應死顧思所以處汝未決耳妻曰我何難君爲男子乃爲婦人謀乎遂命妾饋良食抱其子欷歔如廁置子池傍自投池死良久往覓之子匍匐池畔頃之屍浮起良殯殮畢卽列薪於戶寫遺囑

得家人令妾抱幼子往匿某僉事以宗祀爲托遂舉
火抱印合室同赴火死事聞 文皇曰死自其分朝
廷印信良擅毀不得無罪詔徙其家于邊已而風雨
晦冥人或見其出沒台人陳璘私識良死事每談及
流涕沾襟正德間按察使梁材提學副使劉瑞改公
署東水鑑亭爲祠祀良

許廓

許廓字文超襄城人也洪武三十二年鄉舉永樂五
年授錦衣衛經歷未幾遷工科給事中復遷鴻臚寺
左寺丞十年以薦拜工部右侍郎十二年 文皇北

征命督餉明年營建北京廓提督神木廠工竣特賜
宴勞時交趾已入職方戶口田賦未有定額遣廓往
理及還條奏數事 上皆嘉納 昭皇卽位進左侍

郎宣德五年河南民饑流徙者甚衆命廓拊循 上

親製詩送之曰河南百州縣七郡所分治前歲農事
缺始旱澇復繼衣食旣無資民生曷由遂顧予位民

上日夕懷憂慮爾有敦厚資其往勤撫字徙者必綏
輯饑者必賑濟咨詢必周歷母憚躬勞勩虛文徒瑣
碎所至見實惠勉旃罄乃誠庶用副予意廓至旌廉
黜貪榜示有司弗得復有科擾凡夫匠雜役及諸采

游積逋租物悉奏免於是復業者數萬戶廓還上
褒賚備至六年行在兵部尚書張本卒以廓代之本
嚴厲詳密廓承其後濟之以寬人心大悅年五十六
卒

郭濟

郭濟字澤民河南太康人也性沉靜寡言爲兒童時
父母宗族咸奇之年二十舉鄉試第一明年會試不
第拜定州司訓九年遭艱起復改開州兩郡知名之
士多出其門永樂末昭皇監國濟被薦拜左春坊
左司諫宮僚覩其威儀端雅皆稱得人是年秋七月

昭皇嗣位以濟爲滕王紀善居數年多所匡正會交
趾梗化濟自紀善改行人往使其國濟示以順逆之
義而強梗者稍稍馴化及再使卒致酋長款貢上
悅特加褒美正統初遷鎮江知府兩考俱以最書年
七十餘卒於官

張輔

張輔祥符人忠武王玉之子也靖難功歷陞指揮同
知辛巳嗣父都指揮統父兵戰夾河藁城彰德靈壁
有功壬午封信安伯食祿一千石與世券永樂三年
安南國季犛伏兵芹站殺其舊王添平及我使人

上怒命輔充征夷副將軍佐成國公朱能討交趾能
卒進輔大將統二十五將軍兵八十萬入賊境賊恃
東西都及宣江洮江沱江富良江以爲固于江北岸
緣江樹柵增築土城城柵相連亘九百餘里盡發江
北諸府州民二百餘萬守之又於富良江南岸緣江
置椿盡取船艦列於椿內諸江海口每下梶木以防
攻擊賊之東都守備亦嚴時列象陣於城柵內欲守
防以老我師沐晟軍至洮江北岸與多邦城對壘輔
率大軍營於城北之沙灘與晟合勢賊於城下設重
濠濠內密置竹刺濠外坎池以陷人馬輔進兵夜襲

其城以然火吹銅角爲號是夜四鼓遣都督黃中等
御枚昇攻具過重濠以雲梯附城登城以刀亂砍賊
衆驚呼城上火炬齊明銅角競响將士俱奮勇齊登
賊倉皇散走我軍遂入城賊又於城內列陣接戰驅
象當前輔命以畫獅蒙馬神銳翼而前象皆股栗又
爲鏡箭所傷皆退走奔突官軍長驅而進死者不可
勝數於是三江等路悉降輔督兵追賊至日南州奇
羅海口賊困敗黨與奔散生擒季犛及其子澄復於
永盎海口高望山獲僞大虞國王黎蒼僞太子黎芮
餘衆悉降交南平得府十五州四十一縣二百零八

改置布政都司統之六年進封英國公食祿三千石
七年交賊簡定等復亂與化州鄧悉等寇其近城黎
賊餘黨應之其勢日盛命黔國公沐晟總兵討之戰
于生厥江敗績賊益熾攻陷諸郡縣事聞復命輔統
大軍二十萬往征敗賊衆於鹹子澗太平海口等處
獲賊首簡定檻送京師 勅召輔還而以沐晟等追
討餘寇九年陳季擴復反放兵劫掠勢漸猖蔓仍命
輔總師征之十一月輔率舟師追捕季擴等梟賊首
千五百餘人以徇餘賊散走林莽泥澤中追殺殆盡
因留輔鎮守底定之十四年以豐城侯李彬代守而

召輔還京輔還交趾卒不可保洪熙改元進爵太師
宣德元年漢庶人高煦反遣人密約輔爲內應卽縛
其人白于上從 上親征加祿歲三百石時時與蹇
夏三楊侍 上左右備顧問正統十四年歿於土木
之難景泰初贈定興王謚忠烈輔器宇雄烈顧盼有
威不妄言咲三平交南功最著歷事四朝以恭慎善
居功名之際抑可謂名世大臣矣

趙登

趙登字從善祥符人性鯁直言不苟發永樂癸未鄉
舉甲申登進士第拜禮科給事中乙酉以言事謫四

川忠州判官在任十餘年蒞事公廉多惠政稍遷雲
南安寧州知州宣德改元超遷浙江湖州府知府其
操益勵吏民畏服時 宣廟軫念邦本慮元元或阨
於饑詔天下郡國修舉國初義倉之制以備凶歉登
奉揚德意召區里之長及鄉之耆民聚於庭諄切勸
諭里中富羨之家聞言莫不感奮願出穀輸之官不
浹旬輒得穀數萬石倉廩弗能容登鳩工庀材增構
若干楹乃選公正耆民洎殷實淳良之夫嚴慎守護
兼知出納之數申明戒飭委曲詳密大要以絕私無
擾爲本於是里社細民皆歡忭鼓舞仰戴朝廷生成

之恩安吉有費氏者豪橫武斷奪人子女田園縣官莫能制登諭被害者訟之乃列其罪狀以聞竟遷徙其家而人口田產悉還之民郡中由是肅然姦宄屏跡正統壬戌去任其治湖州十有七年精白如一日云

周順

周順字子英祥符人年九齡郡守嘉其蚤慧舉充郡庠生善記誦諸生莫及年長倍者讓其前列以明經中永樂乙酉鄉試前輩科場之文舉其題輒能暗誦不專事舉業尤工於詩下筆新麗溢目字畫端楷尚

書李時叅政河南尤加器重迨李公總裁纂修事自
太學選入史館日引共議贊益弘多有言輒從少師
姚公嘗稱爲館中君子四年授工科給事中嘗偕御
史按治江浙僅半載廉能之聲翕然在朝宁敷奏詳
明語音高朗同列更番奏事每代之言日引讞狀一
覽知其情僞枉直嘗語同列曰下情上達在一言輕
重委曲與說猶或不能盡其辭箠楚之下枉者多矣
在工科以事連逮實非其罪或勸之辨雪可免日久
理科事獨免人謂我何已而罰役蒙宥復敘用亦不
以干人真臨事不苟免坦夷不見戚容蓋自信之篤

有學有守者也

郭原

郭原字秉忠蘭陽人永樂丁酉舉於鄉宣德時授監察御史持身端謹雖故人不敢于私嘗按江西有宦監十九人依藩府勢侵漁百姓原廉得其情奏寘於法人謂有古御史風尋陞陝西按察副使加三品服色後以憂歸而卒

高舉

高舉字雲翰祥符人性高潔少游開封郡庠治尚書有名其父嘗因邊患選爲勇士艱於行俾一僕代之

僕因出不遜語舉時年未二十聞之大怒卽棄學躬
甲冑以往會事寧復學人皆壯之永樂九年辛卯舉
鄉薦戊戌登進士改翰林院庶吉士授兵科給事中
持正不阿慷慨敢言坐是不合於時解官歸汴囊橐
蕭然舊廬不蔽風日惡衣菲食怡如也錢塘于肅愍
公謙巡撫河南雅重之數過其廬至里門卽止辟道
及門肅禮而入或值其飯蔬食菜羹留于對食于欣
然飽之坐談移晷乃去其見重名流如此嘗遇大雨
庭屋水盈尺許舉率妻子濬溝渠妻偶出怨言謂其
任不益家拔鋪於地誤傷其足卽斥之終身不而邵

太守西蜀黃公璿爲買鄰屋居之俾諸子侍養以老年及九十乃卒

韓忠

韓忠字景賢祥符人志行峻潔成童時晨興赴學出里門拾金鳳釵一持回白母曰待尋者至與之少頃里人高氏號於路曰新婦歸寧遺失金鳳釵一疇其拾者應聲還之鄉間高其行弱冠受尚書於郡博陳彥衡得其要義永樂庚子中鄉試明年會試下第卒業成均納交海內名士問學益充甲辰文皇上賓仁宗臨御改元洪熙勅國子監祭酒精簡太學諸生

學行醇正長於撰述者十人聽用六館會舉七十八人三試彙倫堂忠皆在首選乃奉旨同進士劉謙等持節江南諸郡纂修文廟實錄逾年嗣奉宣廟特旨就便采輯仁宗昭皇帝實錄一併進呈事竣還朝史館嘉之宣德庚戌會試名在乙榜授湖廣棗陽縣儒學訓導迎養母姚于宦邸亾何母卒扶柩還原闕改鳳陽府儒學訓導矩範端嚴士習一變久之有退休志乃上疏乞歸得致仕時年五十有五其歸也行笥蕭然惟圖書筆硯而已敝廬二間不蔽風雨乃教授於鄉以自給扁其座曰硯田志無它也河南

巡撫都御史慈谿王公聞其名禮聘爲子弟師辭不
往郡大夫敦請爲郡志總裁儀幣及其門峻却之其
介特如此忠博極群籍尤長於詩平生累千百篇皆
冲淡典實無雕刻綺靡之習自名知耻藁安貧守道
怡然終日年九十神清體健燈下能作細書而湖南
淮西兩地文武士感德慕義問遺不絕忠信之行人
皆稱之無間言焉

劉謙

劉謙字自牧祥符人自幼舉止凝重異羣兒年十七
遣補郡學生劬書攻苦永樂甲午領鄉薦辛丑登進

士第奉勅給餉關陝暨諭祭秦邸事竣還朝適洪熙
改元復奉命鳳陽諸郡纂修文廟實錄宣德初授
陝西醴泉縣知縣以廉惠稱丁未父歿守制還服闋
擢行在山西道御史時浙東平陽銀冶往往爲人竊
發互相讐殺封域弗靖謙奉命往按撫窮民禁奸宄
其患遂息其地與金鄉磐石等三衛鄰居民素被陵
轢莫敢誰何一以法繩之不少貸境內肅然又壤接
國括健訟成風獄事蠲典謙聽斷明允風亦漸革乙
卯冬溫州守何公文淵入爲少司寇適英廟嗣位
詔羣臣各舉所知以聞於是少司寇文淵特薦謙爲

溫州守代已制曰可是歲冬抵溫州廉惠如在醴泉
時嘗語人曰守與令雖官階小大不同皆職民牧赫
赫爲威民不近也察察爲明民罔容也平易近民守
令之道也人以爲名言丁巳夏旱甚率僚屬齋沐禱
於龍湫免冠跣行步拜暮抵神祠禱畢大雨如注歲
以有秋癸亥霖雨壞稼祗晴立應有鹽運使王其秩
滿而去舟過括灘夜被盜誣逮平民若干人謙禱於
城隍之神頃之罪人斯得開釋無辜謙治郡善政甚
多丙寅滿九載將考績北上適以母艱還哀毀成疾
明年歿五十有九歿後乃有福建右布政使之命

謙孝友寬簡平居寡言关外無矯飾性惡侈靡服食尚朴儉持正侃侃人不敢干以私子鵬成化乙未進士官吏部考功主事

蘇璟

蘇璟字士英祥符人初有大志器局闊達領永樂癸卯鄉薦宣德元年選授鴻臚寺序班滿九載擢陝西乾州知州初下車以作興學校爲已任暇則課諸生而勸懲之乾州土瘠民貧恒廢耕作璟以時督創集塲以通貿易立官房以居流亾凡可以利民者無不爲不數載戶口增倍屣正統丙寅滿九載父歿守制

歸服闋改徐州知州徐州爲南北要衝奔走供億民甚苦之乃編定次第月用三日餘得盡力農畝有飛蝗入境禱於城隍之神設坑坎以待蝗悉投入若有驅之者人皆異之正統己巳北虜入寇詔選練達才望者任監察御史璟與焉蒙錫燕賚勅往永平府簡練兵民保障畿輔冬十月虜逼京城引兵入援戮力戰守虜退論者謂璟之功居多景泰辛未擢兩淮鹽運司同知癸酉年六十五矣懇乞致仕天順甲申蒙恩詔進階中順大夫成化庚寅六月卒壽八十有二

張鑑

張鑑字視明儀封人永樂辛丑進士以事註誤謫戍龍門衛正統中睿皇將親征北虜鑑上疏陳其不可請駐蹕宣府選良將任之推轂投劍自副將而下不用命者斬則將權歸一事可成矣上覽奏嘆其有識後守獨石戰得勝宣大屢有功授指揮僉事左遷慶遠衛副千戶子孫世其官年九十卒

王淪

王淪字子清太康人左史鈍之子也弱冠舉進士文皇以其少遣歸卒業久之起授翰林院庶吉士入文淵閣纂修永樂大典是年秋以外艱歸服除時

昭皇監國選經明行修之士授諸皇孫經於是吏

部薦淪引見昭皇問曰汝非王鈍之子耶其學行

吾素所知汝其勉之拜左春坊左司直賜衣一襲禮

遇甚厚洪熙初封建親王淪遂為寧靖王左長史靖

王當祀不齋淪諫不可王不悅宣德四年王就國累

月不視朔淪又上書諫不聽頃之擬荀卿成相篇撰

十二章以獻語尤激切而左右有不便者日又浸潤

由是與王不合上聞之移書讓王王終不聽六年

召還改行在戶部郎中睿皇即位拜淪戶部右侍

郎巡撫浙江未幾母卒上遣行人諭祭命淪卒事

起復淪既辭弗獲復如浙罷力役寬賦斂舉廉能蒞
事五年督運軍餉一千餘萬石招撫流移五萬餘戶
獄訟不興盜賊屏息兩浙父老感而歎曰真先大夫
布政子也會入覲 上留攝部事明年春淪以老乞
歸卒年七十四有退菴集六卷